

Kolosi

Kolosi niŋ Yesuyen alya bereya hitte Pol beleş asaŋ kayyiŋ

¹⁻² Ne Polbe kadininiŋ Timotiya dufay uŋkuren po kerdeb deŋ Kolosi taunde niŋ Yesu Kristuyen alya bereya sios niŋ asaŋ gago kaŋ hime. Nebe Al Kurunyen dufayde Yesu Kristuyen mere basan al aposel himirin. Deŋbe Yesu Kristuya heŋ Al Kurun diliŋde wukkeŋ hitin, irde bitin de mat fudinde wor po meremiŋ gama irde hanŋen.

Ninŋeb Adoniniŋ Al Kurun beleş buninŋen dirde iŋin iŋin dirde bitin yisikamke iŋin po hiwon yen nurde hime.

³⁻⁴ Be, deyyabe deŋ beleş Yesu Kristu niŋ dufaytin sanin irde Al Kurunyen alya bereya goke amanŋen nurde yunen hanŋen gote mere momoninŋ goyen nurde haryen. Ninŋeb deŋ ge teŋ Doyan Al Kurunniŋ Yesu Kristu Naniŋ Al Kurun mere irde henŋabe huginŋen iŋin nurde unen haryen.

⁵ Deŋ beleş Yesu niŋ dufaytin taren irde kadin ge amanŋen nurde yunen hanŋen mata gobe Al Kurun beleş kame iŋin iŋin diryen go yen dufay heŋbe gogo gwaha teŋ hanŋen. Dufay gobe hanŋapya Yesu niŋ yitin mere iŋin fudinde goyen nuramin de mat forok yirin. Dufay gokeb deŋ goyen Al Kurun beleş kame iŋin iŋin yiren yen nurde ga hi.

⁶ Mere igiñ goyen hañkanya wor po den hitte kukeb Al Kurun belen buniñen dirde igiñ igiñ dird dird mere goyen nurdeb fudinde yamiñ. Irdeb dufaytiñya matatiñyabe hoyañ wor po hamiñ. Gwahade goyen po, megeñ kurun gayen mere igiñ gore igineñ heñ kurun heñ kuñ hi.

⁷ Denbe mere igiñ goyen meten kadniniñ wor po Epafras belen kuñ momon dirke nuramiñ. Yenbe binde mat fudinde wor po Yesu Kristu niñ meten teñ hiyen. Niñgeb neñ belen kuñ saba dirtiñenbe yeñ belen neñ farañ dure yeñ gogo kuñ saba diriñ.

⁸ Irdeb mulgañ heñ wañbe den belen Holi Spirityen tareñde kadtiñ ge amañen nurde yunen hanjen goyen momon diriñ.

Kolosi niñ mar niñ Al Kurun gusuñan irde hin-hin

⁹ Niñgeb mere momonñtiñ nurarun goyenter mat den ge teñ Al Kurun gusuñan ird ird niñ bada ma heñ haryen. Gusuñan irde henyabe Holi Spirit belen yende dufay wukken kurun goya meremiñ bebak teñ teñ sañiñya goyen dunwon, irkeb Al Kurunyen dufay keneñ kenkela wor po bebak tiwon yeñ gusuñan irde haryen.

¹⁰ Gogab matatiñ gobe Doyañ Al Kurunyen alya bereya belen mata teñ hanjen gwahade po teñ hinayiñ, irde yeñ belen amañen nurde hitek mat po mata teñ hinayiñ, irdeb meten igiñ po teñ gote igineñ kurun forok yirde hinayiñ. Irde Al Kurunbe al gwahade yeñ kenkela nurde yenya kadam nurd gunen teñ teñ gobe kurun heñ tareñ heñ hiyen.

11 Irdeb kanduk kurayen kurayen kurun yeney hinayin gega, taremin kurun turun yan goreb sanin dirkeb kanduk goke mukku ma ten goya goya sanin po hen hinayin. Irde Al Kurun belen kanduk goyen pasi irwon yen doyan hen hen ge pinen ma hen hinayin. Irdeb mata den hitte forok yen hinayin kurun goke amanen wor po nurde henya

12 Nanninin igin nurd unen hinayin yen gusunan irde haryen. Adonininbe mata igin hulsire nin mar yen belen doyan yirde igin igin yirde hi gwahade goyen po, den manan igin igin dirtek mar diryin.

13 Irdeb mata bulunyen kidoma bana mat dumulan ten Urmin bubulkuñe wor po yen nurde untiñ al gore doyan yirde hi gasun bana gon dawaryin.

14 Urmin gore mata buluninin halde dunyin geb, nenbe kidoma bana ma hen igin po hite gago.

Yesu Kristuyen mataya metenya

15 Be, Yesu Kristube al belen kenenbe Al Kurun banare hi gobe al gwahade yen bebak titek. Yenbe det kurun gate min al.

16 Yen belen gab Al Kurun belen inke det kurun gayen yiryn. Det naninde ninya megen ninya, det kawan ninya banare ninya yiryn. Banare ninbe Al Kurunyen miyon taremin karkuwan kurayen kurayen hende ninya bande ninya, al denem yanya denem monya goyen yiryn. Forok yamin kurun gobe yen belen yingen ge ten yiryn.

17 Yenbe det kurun gayen forok ma yekeya hinhin. Irdeb det kurun gayen yirdeb gwahade

po hinayin yen yiryin gwahade po gasunjenyan han.

¹⁸ Yenbe alya bereyamin sios gote doyan al wor po geb, siosbe Yesuyen ulin pigin yara, irdeb yingenbe sios gote tonan. Yenbe al kamtinde mat huward huward mata goyen min uryin al geb, yenbe mata gote min al. Gogab det kurun gate doyan al kurun hewen yenbe gogo gwaha tiyyin.

¹⁹ Al Kurunbe matamin, dufayminyabe tareminya goyen tumnan Urmin unen unen nin amanen nurdeb unyin.

²⁰ Irde Al Kurunbe megen nin detya nankinde nin detya kurun gayen yanya awalikde hen hen goke amanen nuryin. Ningeb gwaha ire yenbe Urmin ten kerke katen kuruse hende darim wok irde kamyin.

²¹ Hakot denbe mata bulun ten hinhan geb, dufaytinbe gisaw wor po hen Al Kurun hitte ma hinhan, irde asogo irde hinhan.

²² Gega Al Kurunbe denya awalikde hitek yenbe Urmin ten kerke katen al wor po hen kuruse hende kamyin. Gogab hanke gabe den kurun gayen dilinde wukken hen ultinde merem mon henbe gwaha mat kura merem yan dirtek mon hinayin yen gogo gwaha tiyyin.

²³ Ningeb gwahade hitek yenbe dufaytin Yesu nin sanin irdeb gwahade po hinayin. Dufaytin yen ge tareng iramin goyen tareng po tanarde hinayin. Irde Yesu nin yitin mere igin go nurde kame Al Kurun beleng igin igin diryen go yen nurd nurd gobe go ma tubul tinayin. Mere igin gobe megen nin alya bereya kurun gayen momon

yirde tukutiñ hañ. Ne Pol wor mere igiñ tagalde tukun tukun meten al wor po himiriñ. Niñgeb mere igiñ goyen deñ wor nuramiñ.

Kolosi sios Pol beleş farañ uryiñ

²⁴ Be, nebe deñ ge teñ ulne misiñ katen hime goke amañen nurde hime. Yesu Kristuyen alya bereya siosbe Yesu Kristu uliñ pigiñ yara geb, sios beleş kanduk yenen hi gobe Yesu Kristu yinğen kanduk yenen hi yara. Niñgeb kanduk kurun sios hitte forok yeñ hañ goyen ne hitte manañ tumñañ forok yeñ hinayiñ goke amañen nurde hime.

²⁵ Nebe Al Kurun beleş deñ ge teñ meremiñ tumñañ tagalde tukun hayiñ ninyiñ. Niñgeb goyen meten teñ teñ al himiriñ geb, gago meten teñ hime.

²⁶ Bikkenbe Al Kurunyen mere gote miñbe ulyañde wor po banare hinhin. Niñgeb megen niñ al tumñañ bebak ma teñ hinhan. Gega gayenterbe alya bereyamiñ hitte kawan yikala yirkebe bebak teñ hañ.

²⁷ Mel gobe Al Kurun beleş meremiñ igiñ wor po turnun yañ gote miñ banare hitiñ goyen yikala yirmeke bebak tinayiñ yeñ nurdeb al miñ hoyañ Yuda mar moñ bana niñ mar goyen basaña yiryiñ. Meremiñ banare hi gote miñbe gahade: Yesu Kristube denya hañ geb, deñ wor Al Kurunyen sañiñ turnun yañ bana hinayiñ.

²⁸ Goke teñbe Yesu Kristu niñ al buda kurun gayen momoñ yirde tukun hityen. Irde daha wor al buda kurun gayen Yesu Kristuya heñbe muñ kura bulun miñmoñ hinayiñ yeñ Al Kurunyen dufay wukkenđe al bebak yirde saba yirde hityen.

²⁹ Nebe meten gayen gake ulne misin tap urde kurut wor po yen himyen. Gwaha ten henjabe ne hitte meten taren po ten hi al gote taren de meten ten himyen.

2

¹ Be, den Kolosi nin marya Laodisia nin marya irde kenkela ma nurd nunen han marya goyen tumnan faran durd durd nin kurut wor po yen hime gayen den tumnan nurwon yen nurde hime.

² Den ge ten kurut yen hime gabe kurut yen hime gore faran durke bitinde mat sanin henbe kadtin ge amanen nurde awalikde hinayin yenbe gago kurut yen hime. Gogab Al Kurunyen dufay nurde bebak ten ten tarenbe kurun hiyyen. Irde gab Al Kurunyen mere gote min bikken banare hinhin goyen min nurnayin. Al Kurunyen mere gote min banare hinhin gobe Yesu Kristu.

³ Yen banabe Al Kurunyen dufay wukkenya meremin bebak ten ten dufayya goyen bana yirtin han. Dufay wukkenya meremin bebak ten ten dufayya gobe samun taren wor po.

⁴ Monjo al kura beken wan usi dirde Yesu Kristu nin dufaytin sanin irtinde mat hoyan dukunak geb, mere gago dirde hime. Gogab go mar gote mere hapek yan goyen fudinde yen ma nurnayin.

⁵ Nebe denya tumnan gor ma hite goyenbe, dufaynerbe denya tumnan gor hite. Irdeb hen hentinde kenkela wor po han goke aman hen hime. Irde Yesu Kristu nin dufaytin taren irde han goyen manan korgon mon, taren irtin han goke manan aman wor po hen hime.

Yesuya po heŋ mata teŋ hitek

⁶ Niŋgeb Yesu Kristube Doyaŋ Al Kurunŋniniŋ yeŋ nurd unamiŋ geb, hugiŋeŋ yeŋya heŋbe mata igiŋ po teŋ hinayiŋ.

⁷ Irdeb he filginiŋ kura megeŋ biŋde kurkuŋ saŋiŋ haŋyen go gwahade, irde ya kura tola tareŋ hende irtiŋ go gwahade goyen po, Yesuya heŋ tareŋ heŋ hinayiŋ. Irdeb saba dirteke yeŋ ge dufaytiŋ saŋiŋ iramiŋ gobe tareŋ po tanarde hinayiŋ. Irdeb hugiŋeŋ Al Kurunŋ igiŋ wor po nurd uneŋ hinayiŋ.

⁸ Be, al kura belenbe megeŋ niŋ saba momoŋ dirde hikeb fudinde yeŋ nurde gama ma yirde hinayiŋ. Go mar gote sababe miŋ miŋmoŋ wor po. Yeŋbe asem yagot tukulaya megeŋ niŋ sabaya go po gama yirde haŋ. Yesu Kristuyen merebe gama ma irde haŋ. Niŋgeb saba gobe Yesu Kristuyen moŋ.

⁹ Yesu Kristube Al Kurunŋ gega, al wor po heŋ megeŋ gar hinhin. Niŋgeb yeŋ po gab Al Kurunŋyen dufayya matayabe tareŋmiŋya goyen maŋiŋ wor po hitiŋ hi.

¹⁰ Deŋ wor Yesu Kristuya heŋ dufaymiŋya matamiŋyabe saŋiŋmiŋya goyen kurunŋ wor po dunke maŋiŋ hitiŋ haŋ geb, saba hoyanŋ kura gama irtek ma haŋ. Yeŋbe megeŋ niŋ doyaŋ mar banare niŋya kawan niŋya kurunŋ gote doyaŋ al wor po.

¹¹ Be, Yuda mar guba yeŋ haŋyen gwahade yara, deŋ mananŋ Yesu Kristuya hikeb yeŋ belen mata hoyanŋ mat guba yeŋ duntiŋ yara diriŋiŋ. Yeŋ belen guba yeŋ duntiŋeŋbe bitiŋde mata bulunŋ

tenj tenj dufay goyen yad siņa yiryiņ. Gobe al belen haninđe guba yeņ hanyen gwahade moņ.

¹² Yesu belen guba yeņ yeņ mata duntinjenbe fe baptais tenj tenj mata dunyiņ. Deņ baptais tamiņ gote miņbe Yesu kamke mete tiyamiņ gwahade po, deņ wor fe bana kurkamiņ gobe kamtiņen tiyamiņ. Goyenpoga Al Kurun belen Yesu kamtiņde mat isaiņ hiriņ tareņmiņ goke dufaytiņ tareņ irkeb Al Kurun belen deņ wor disaiņ hitiņ yara dirde al gergen diriņ.

¹³ Be, deņbe Yuda mar moņ al miņ hoyaiņ. Niņgeb hakotbe Moseyen saba ma nurdeb mata buluņ kurayen kurayen tenj heņbe Al Kurun diliņde kamtiņ yara hinhan. Goyenbe Yesu Kristu isaiņ hiriņ gwahade goyen po, deņ wor disaiņ hitiņ yara dirde al gergen diriņ. Al Kurunbe gwaha mat neņ kurun gate mata buluņ halde dunyiņ.

¹⁴ Neņbe mata buluņ tenj hitekeb Moseyen saba gore merem yaņ dirtek hinhet. Goyenpoga Al Kurunbe Yesu Kristu belen kuruse hende kamiņ gwahade po, merem yaņ dirtiņ goyen wor kuruse hende kerde mayde pasi iryiņ.

¹⁵ Gwaha matbe Al Kurun belen megen niņ doyaiņ mar banare niņya kawan niņya kurayen kurayen gote saņiņ goyen yad siņa yiryiņ. Tareņmiņ yad siņa yiryiņ goyen al belen keneņ bebak tinaņ yeņbe gogo Yesu kuruse hende kamiņ.

Megen niņ marte mata ma gama irnaiņ

¹⁶ Niņgeb al kura waņ dula tenj tenj mataya Al Kurun niņ dufay heņ heņ ge gabu ird ird nalu karkuwaiņa gagasi gergen forok yeke goke gabu

irde dula ten ten matayabe Sabat naluya goyen goke gwaha gwaha ten hinayin dinen tikeb kenen unan ten hinayin.

¹⁷ Mata bikkek kurun gabe kame mata gergen forok yetek gote tunanen po hinhan. Irde Yesu Kristu wayyinde matbe mata gergen fudinde goyen forok yamin yenen hite gago.

¹⁸ Be, al kurabe ne harhem harhem dufay minyan gega, dufay goyen bana kerdeb al denem minmonde mata yara ten hanyen. Irde al kurabe Al Kurunen miyon dolon yird yird nin aman hen hanyen. Go mar gobe huginen mitereya yuwarwarte ya det yenen henbe goke ug po tagalde hanyen. Irde megen nin dufay po gama irde han geb, yingen ge turun turun ten hanyen. Ningeb denbe kame matatin gote murungem igin yawartek gega goyen gore usi dirke son henak geb, taren hen hinayin.

¹⁹ Go mar gobe Yesu Kristuya gabu hetek mon, hoyan hoyan wor po. Gega nenbe Yesu Kristu ulin pigin yara, munan yingenbe tonan yara geb, nenbe yen hitte mat basan henbe kurabe hanin, kurabe kahan gwahade ala henbe kadom faran gurd ten hite. Irde Al Kurun belen gwaha mat mat taren henayin yen nurde hi gwahade mat po sanin hen hite.

²⁰ Be, denbe Yesu Kristuya tumnan kamamin geb, megen nin saba gote yufukde ma han. Gega dahade geb saba bikkek goyen gama po irde han? Saba bikkekdebe,

²¹ “Det gobe tanarde ma, irde det go goya nene ma, munan det gobe sisan urde ma,” yitin goyen

daniñ geb gama irde hañ?

²² Saba bikkek gobe megen niñ al belen po forok yirtin, irde megen niñ det mugol netek goke yen yitin.

²³ Saba bikkek gama irde hañ mar gobe Al Kurun doloñ ird ird mata goyen tareñ irtek yenbe yingen de dufaymin po gama irde tareñ irde hanyen. Irde ne harhem harhem dufay minyan gega, dufay goyen bana kerdeb al denem minmonde mata yara ten hanyen. Irde mata bulun ulniniñde hañ gayen hubu hewon yen nurdeb ulin yusulak ten, binje kutña irde, ulin de mata kurayen kurayen ten hanyen. Mata gwahade ten hañ mar go yenenminbe dufay wukken gama irde hañ yara. Goyenpoga go mar gobe mata bulun ten ten niñ bin harkeb dufay bulun go epte ma hika titek hañ.

3

Al Kurun diliñde wukken hen hen mata

¹ Goyenpoga denbe Yesu Kristuya kamtin de mat huwaramin geb, bitin de mat wor po det Al Kurunyen gasun de hañ goke po nurde hinayin. Al Kurunyen gasun de gorbe Yesu Kristu belen Doyan Al Kurun henbe Al Kurunyen haniñ yase belen keperde hi.

² Niñgeb det Al Kurunyen gasun de niñ goke po dufay hen hinayin. Det megen niñ ge ma dufay hen hinayin.

³ Denbe Yesu Kristu niñ dufaytin sanin iramin goya goyenbe yenya kuruse hende kamamin yara hamin. Irdeb kamtin de mat Al Kurun belen disan

heke huwarde al gergen hamiņ. Niņgeb Yesu Kristu Al Kurun hitte hi gwahade goyen po, den al gergen hitiņ mar wor Al Kurun hitte haņ.

⁴ Niņgeb Al Kurunya hugiņeņ heņ heņ mata gote miņ al Yesu Kristu tareņmiņ turņuņ yaņ goya megen gar forok yiyyeņya goyenbe den wor tareņtiņ turņuņ yaņ manaņ forok yenayiņ.

⁵ Niņgeb megen niņ mata buluņ uliņde haņ kuruņ gobe yisikamnaņ ko. Mata buluņ gobe gahade: leplep mata, mata buluņ mormok dapņa kukuwa beleņ titiņ yara teņ teņ mata, uliņde amaņ hetek mata teņ teņ dufay, mata buluņ teņ teņ dufayyabe det uguņ po yad yad niņ dufay heņ heņ mataya. Det uguņ po yad yad niņ dufay heņ heņ mata gobe uņgura doloņ yird yird mataya tuņande.

⁶ Al Kurunyen beararbe mata gwahade teņ haņ mar goke katyeņ.

⁷ Den wor hakotbe mata buluņ gwahade goyen teņ kuņ hinhan.

⁸ Gega gayenterbe mata buluņ gahade gayen yubul po tinayiņ. Mata gobe gahade: bearar mata, kuņuruņ mata, al buluņ yird yird dufay, mere buluņ mat teņ teņ matayabe nanyaņ teņ teņ mataya. Niņgeb denbe mata goyen tumņaņ po yubul tinayiņ.

⁹⁻¹⁰ Denbe mata bikkek bitiņ bana haņyen goyen yad siņa yirdeb al gergen haņ geb, kadom usi gird ma teņ hinayiņ. Al gergen hitiņ gobe Al Kurun beleņ yingeņ yara dirde gergen diriņ geb, gogo hugiņeņ gergen dirde hikeb Al Kurunbe al gwahade yeņ keņkela nurdeb yeņya kadom nurd

gunen̄ teŋ awalikde wor po hinayin̄.

¹¹ Al Kurunya awalikde hiniŋ yeŋ nurde haŋ marbe igin̄ gwaha teŋ hinayin̄. Yesu Kristube Kurun̄niniŋ wor po. Yeŋbe neŋ kurun̄ gaya awalikde hite. Niŋgeb Grik mar ma Yuda mar, guba yitiŋ mar ma guba ma yitiŋ mar, saba karkuwan̄ yawartiŋ mar ma gwahade ma yawartiŋ maryabe meten̄ mar ma doyan̄ marya kurun̄ goyen banabe bipti miŋmon̄. Igin̄ ala po Al Kurunya awalikde hinayin̄.

¹² Niŋgeb den̄be Al Kurun̄ belen̄ bubulkuŋne wor po yeŋ nurde dunen̄ basiŋa dirde wukken̄ wor po dirtiŋ haŋ geb, matabe gahade teŋ hinayin̄: kaktiŋ ge bunin̄en̄ nurd yunen̄ hinayin̄, irde igin̄ igin̄ yirde hinayin̄, dindiken̄ ge turun̄ turun̄ ma teŋ hinayin̄, bekken̄de igin̄ mat al mere yirde hinayin̄, irde kaktiŋ kura matamiŋ igin̄ hewon̄ yeŋ doyan̄ heŋ heŋ ge piŋen̄ ma heŋ hinayin̄. Mata gahade gab ulitiŋ umŋa yade hor yirde kuŋ han̄yen yara hugin̄en̄ gwaha po teŋ hinayin̄.

¹³ Al kaktiŋ kura belen̄ bulun̄ dirke goya goke bulunen̄ ma nurnayin̄. Doyan̄ Al Kurun̄ belen̄ mata bulun̄tiŋ halde dunyiŋ gwahade goyen po, ditiŋde mata bulun̄ goyen wor halde yunen̄ hinayin̄.

¹⁴ Irdeb mata igin̄ igin̄ buda kurun̄ go hendebe kaktiŋ ge aman̄en̄ nurd yunen̄ yunen̄ matatiŋ yan̄ hinayin̄. Gwaha teŋ hinayin̄be den̄ tumŋan̄ goyen al miŋ un̄kuren̄ wor po heŋ awalikde po hinayin̄.

¹⁵ Be, Yesu Kristube al biŋ yisikamde kamde al. Niŋgeb tubul tike yeŋ belen̄ bitiŋ yisikamkeb

awalikde hinayiņ. Deņbe al miņ hoyañ hoyañ gega, awalikde heņ Yesu yufukde al miņ unjkuren heņ heņ goke teņ basaņa diryiņ. Irdeb goke teņ Al Kurun igin nurde unej hinayiņ.

¹⁶ Irde Yesu Kristuyen merebe bitiņ bana gasun unke keņkela wor po kipiryen. Irdeb keņkela dufay heņ Al Kurunyen mere kadam saba gird teņbe, “Gwaha mat hitek gab igin,” yen kadam momon gird teņ hinayiņ. Irdeb bitiņde mat Al Kurun igin nurd unenya Al Kurunyen asande niņ tikiņya Al Kurun turun ird ird tikiņyabe Holi Spirit belen bitiņde tikiņ yupul titiņ goyen tikiņ heņ hinayiņ.

¹⁷ Irdeb mere teņ hinayiņ ma mata kura teņ hinayiņ kurun gobe Doyañ Al Kurun Yesu nurd untiņ mar belen titek mat po teņ hinayiņ. Irdeb Yesu Kristu hitte mat saņiņ teņbe Al Kurun igin nurd unej hinayiņ.

¹⁸ Be, deņ bere almetiņ yanbe almetiņ yagot yufukde po hinayiņ.* Go teņ hinayiņ gobe Doyañ Al Kurun gama irde haņ mar belen mata titek goyen po teņ hinayiņ.

¹⁹ Deņ al berem yanbe bertiņ yago niņ amaneņ nurd yunenbe mata yen biņ misiņ nurtek mat ma yirde hinayiņ.

²⁰ Deņ diriņbe mamtiņya nantiņyat mere nurdeb gama irde hinayiņ. Doyañ Al Kurunbe mata gwahade gokeb aman heņ hiyen.

²¹ Deņ diriņ naniņ yagobe diriņtiņ yago biņ ar yenaņ mat ma mata yirde hinayiņ. Mongo gwaha

* **3:18:** Mere gabe albe hende berebe bande yen ma yitiņ. Albe Al Kurunyen mere saba yirke berembe nurde gama iryen yen goke yitiņ.

yirkeb kame kafura dufay kurun henbe keperd keperdmin igin ma henayin geb.

²² Den al kurat yufukde hen meten ten han marbe megen nin doyan martinde mere nurde hinayin. Meten ten hinayin goyen doyan martin yago belen den hikeya po gwaha titekeb turun dirnan yen nurdeya ma meten ten hinayin. Gwaha titnenbe Doyan Al Kurun palap irde yen ge meten ten hite yen nurdeya bitinde mat wor po doyan martin ge meten ten hinayin.

²³ Meten ten hinayin kurun gobe bitinde mat wor po Doyan Al Kurun nin meten ten hite yen nurdeya meten ten hinayin. Al nin meten ten hite yen ma nurde hinayin.

²⁴ Mata gwahade ten hinayinbe Doyan Al Kurun belen mata igin ten hinayin gote murungem dunen yirin goyen dunen. Ningeb meten ten hinayin kurun gobe Doyan Al Kuruntin Yesu Kristu nin meten ten unen hite yen nurde gab meten ten hinayin.

²⁵ Munan al kura mata igin ma ten hiyenbe gote wolminenbe murungem bulun tiyyen. Al Kurunbe al kura po igin inen, kurabe bulun inen ma yirde hiyen geb, bulun titekeb bulun diryen.

4

¹ Be, den doyan mar wor gwahade po meten martin goyen mata huwak mat po kenkela doyan yirde hinayin. Den wor Doyan Al Kuruntinbe Al Kurunyen gasunde hi gogo yen nurde han geb, gago dinen hime.

Al Kurunya mere ten ten matatinbe taren po irnayin

² Be, nalutin kurunbe Al Kurun mere ird ird nin nurde hinayin. Irdeb Al Kurun mere irde henyabe dufaytin mali hiburnen ma hiyen. Irdeb bitinde mat amanen nurde unen turun irde hinayin.

³ Be, Al Kurun mere irde henyabe nen belen Yesu Kristu nin yitin mere banare hi goyen tagaltek belnen kerd dunkeb al budam mere goyen nurnayin yen gusunan irde hinayin. Nebe mere go tagalde himeke goke nad koyare neran gago hime.

⁴ Ningeb ne nin Al Kurun gusunan irde hinayin. Irkeb mere tagalen yen nurde hime gobe kama ma hen kenkela po tagalen.

⁵ Be, Yesu Kristu nin ma nurde han mar hittebe dufay kenkela hen ga mata ten hinayin. Irdeb Yesu nin momon yirtek belen kura kenen goya kama ma hen momon yirde hinayin.

⁶ Irdeb meretinbe huginen al belen nurdeb, “Fudinde, ne faran nure yenbe gago mere nirde hi,” yen nurtek mat mere ten hinayin. Irdeb al belen gusunan kura dirkeb gwaha mat wol hetekbe igin nurnayin mat po wol hen hinayin.

Mere funan

⁷ Be, Tikikus belen gab ne dahade hime goyen momon diryen. Yenbe kolne wor po yara, irde binde mat fudinde wor po Doyan Al Kurun nin meten ten hiyen. Yenbe meten kadne igin wor po.

⁸ Yen belen gabe nen dahade hite goyen momon dirke go nurdeb aman hen taren henayin yen gago hulyan irhem.

⁹ Yenbe Onesimusya kuriryen. Onesimus wor binde mat fudinde wor po Doyan Al Kurun nin meten ten hiyen. Yenbe kolninin wor po yara. Yenbe al hoyande nin mon, dende al po. Irem garebe nen hitere gar mata forok yen han kurun gayen tumnan momon diriryen.

¹⁰ Be, kadne kura neya koyare har al Aristakus belen den ge dufay hen hi gayen momon yirayin ninkeb gago dinen hime. Banabas nomin Mak wor gwahade po den ge dufay hen hi. Yen ge momon dirmirin gogo geb, yen kun forok yeke kenenbe gargar irde kenkela doyan irde hinayin.

¹¹ Be, Yesus denem kurabe Yastus manan den ge dufay hen hi. Meten faran nurde han mar bana gonbe al karwo ga po ga Yuda mar. Mel gobe neya hen Al Kurun belen alya bereyamin doyan yird yird gote meten ten kun hityen. Irde kurare kanduknen nurde himekeb bene yurum irde hanjen.

¹² Be, dende al kura Yesu Kristuyen meten al Epafraas goyen wor den ge dufay hen hi goyen momon yirayin ninke gago momon dirde hime. Al gobe dende al. Yenbe den goyen Al Kurunyen dufay tumnan yenen bebak ten sanin po huwardeb Yesuyen mere gama ird ird ninbe al parguwak yara hen yen ge hekken wor po nurde hiwon yen huginen taren po Al Kurun gusunan irde hiyen.

¹³ Yenbe den ge po mon, Laodisia taundeya

Hierapolis taundeya niŋ Yesuyen alya bereya goke wor tareŋ wor po Al Kurun gusunan irde hiyen gobe fudinde yeŋ dinen hime.

¹⁴ Kadninin wor po yeŋ ge amanen wor po nurde hityen al guram al Lukyabe Demasya manan den ge dufay hen har goke momon yirayin ninkeb gago dinen hime.

¹⁵ Laodisia taunde niŋ Yesuyen alya bereya goya bere kura Nimfayabe yaminde gabu irde Al Kurun dolon irde hanjen marya goyen manan ne niŋ yeŋ, “Yeŋ belen den ge dufay hen hi,” yinnayin.

¹⁶ Be, asan gayen den wa kapyan henbe Laodisia taunde niŋ Yesuyen alya bereya sios wor kapyan henayin yeŋ ten kerke gor kuyen. Irdeb asan kura yeŋ ge kamin goyen wor kamebe den belen wor ten kapyan henayin.

¹⁷ Irdeb Akipus goyen, “Doyan Al Kurun belen meten guntin gobe kenkela tanarde meten ten hayin,” innayin.

¹⁸ Ne Pol belen hanner wor po gahade kan hime: “Den ge dufay hen hime.”

Be, ne koyare hime gake bitin sir ma yiyyen. Denbe Al Kurun belen buninen dirde igin igin dirwon yeŋ nurde hime. Gogo po.

**Al Kurunyen Mere Igin
The New Testament in the Gwahatike Language of
Papua New Guinea
Nupela Testamen long tok ples Gwahatike long
Nuigini**

copyright © 2000 Wycliffe Bible Translators, Inc.

Language: Gwahatike

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-10

PDF generated using Haiola and XeLaTeX on 18 Apr 2025 from source files dated 31 Aug 2023

dbba218f-41f3-5f08-b0b6-2a7c919093ab